



CENTRALE BANK VAN ARUBA

Comunicado di Prensa

Resultado Encuesta di Corupcion 2020

Percepcion ta cu corupcion ta comun y creciente

Oranjestad, 8 februari 2021 - Banco Central di Aruba (BCA) awe ta publica su rapport Report Corruption Survey (RCS) 2020. E resultadonan di e encuesta aki ta muestra cu un mayoria grandi di personanan encuesta, cual a alcanza 94 porciento na 2020 for di 81 porciento na 2019 y 76 porciento na 2018, tabata di opinion cu e problema di corupcion tabata comun y creciente. Positivo ta cu un averahe di 95 porciento di personanan encuesta a bisa cu varios actonan corruptivo ta inacceptabel.

Casi mita di personanan encuesta ta pensa cu e mas efectivo cu un hende comun por haci pa combati corupcion ta door di raporta corupcion, mientras cu personanan encuesta a menciona cu e introduccion di un maneho pa denuncia irregularidadnan den e sector publico ta e medida principal cu gobierno por tuma pa combati corupcion. Ta percibi cu Ministerio Publico y Bureau Integridad Aruba ta e dos organisacionan principal cu mester lidera e lucha contra corupcion.

E RCS 2020, cual ta disponibel riba e website di BCA, ta presenta e resultadonan mas importante di e encuesta di corupcion ehecuta na 2020. E ta enfoca riba e percepcion di residentenan riba e nivel di corupcion, nan experiencia cu corupcion ora di usa servicionan particularmente den sector publico, y e necesidad pa medidanan adicional pa combati corupcion.

Frena corupcion ta un prioridad halto pa BCA, pasobra corupcion tin consecuencianan negativo economico y social cu por impedi BCA di cumpli cu su mision. Diferente organisacionnan internacional, manera Transparency International, ta ehecuta encuestanan riba e nivel di corupcion na diferente pais. Como cu Aruba no ta forma parti di e encuestanan internacional aki y pa cu e motibo ey data importante di corupcion no ta diponibel, BCA ta conduci e encuesta di corupcion desde 2018.

E rapport CORRUPTION SURVEY 2020 ta disponibel riba e website di BCA <https://www.cbaruba.org/cba/manageDocument.do?dispatch=view&id=5620>. Por haya resultadonan di encuestanan anterior di corupcion aki tambe.

Tocante Banco Central di Aruba

E proposito principal di Banco Central di Aruba (BCA) ta pa contribui na estabilidad financiero y prosperidad economico di comunidad di Aruba. BCA ta logra e mision aki door di implementa un maneho monetario efectivo dirigi na mantene estabilidad di balor di e florin, promove e solides y integridad di e sistema financiero, y yuda mantene un sistema di pago eficiente y confiabel.

Banda di su tareanan nucleo, BCA ta encarga cu emision di biyete di florin y moneda di florin, y ta e bankero di gobierno. Ademá e ta regula e transaccionnan di pago cu exterior y ta administra e divisanan di Aruba y ta controla e uzo di esaki.

Pa mas informacion tocante Banco Central di Aruba, por bishita e website www.cbaruba.org

Nota (no pa publica)

Si tin cualkier pregunta riba e topico aki, por tuma contacto libremente cu sra. Edwina Pereira, Division Manager Strategy, Planning & Information na BCA y alabes lider di e proyecto, na tel. 5252100 of via e-mail: e.e.matos-pereira@cbaruba.org.